

Tema: Laat skyn die heerlikheid van God in jou lewe met genade (liefde) EN waarheid!

Lofsang ter voorbereiding van die erediens

Sb 1-3: 1, 2, 3 (Mel: Ps. 128)

Lied 167: 1, 2

Ontmoetingsdiens

Intreelied Lied 155: 1, 2, 3

Votum

Seën

Loflied Sb 2-4: 1, 3

Geloofsbelijdenis:

NGB artikel 20

Verootmoedigingsdiens

Wet uit Psalm 15

Sing Ps. 86-1: 6, 8

Gebed

Woorddiens

Skriflesing: Johannes 1: 1 - 18

Teksvers: Johannes 1: 14

Sing Sb 4-8: 1, 2 (Mel: eerste mel)

Woordverkondiging

Antwoorddiens

Bevestiging van ouderlinge en diakens;

Sing Ps. 134-2; 2

Liefdegawes

Gebed vir Bediening na Buite (Suid-Sudan)

Sing Sb 3-2: 1, 2, 5, 6 (Mel: Sb 18-6)

Seën

Amenlied Sb13-2.

Geliefde brs en srs en liewe kinders

Hoe beleef jy God in jou verhouding met Hom? Ervaar jy God as 'n liefdevolle en vergewende God of as 'n kwaai pa wat net kyk wat jy verkeerd doen en met jou raas?

Kom ek stel dit so vir die ander van ons wat meer verstandsmense is: hoe sien en dink jy oor God? Sien jy God as regverdige God wat hou by die waarheid of sien jy God as 'n barmhartige God wat sonde oorsien?

Dis tog vreemd dat ons as mense wil kies tussen die twee eienskappe van God. Sommige wil God sien net as 'n genadige en liefdevolle God wat my sonde vergewe en ander hou weer van God as God van die waarheid wat sy wil en wette voorhou en ons moet daarby hou. Dit is asof daar by ons mense en in ons denke oor God spanning bestaan tussen genade en waarheid. Dit voel vir ons die twee kan nie saam loop nie! Genade sluit waarheid uit of waarheid kan nie genade betoon nie!

Johannes sê egter dat hulle as dissipels en almal wat Christus gesien en geken het, al twee hierdie heerlike, wonderlike eienskappe van God in volle en oorvloedige mate in Christus gesien en beleef het!

Ons teks leer dat Christus God die Vader aan ons kom wys het (kom openbaar het) en wat Hy kom wys het is nie net een kant of een aspek van God nie! Nee, in Christus openbaar God Homself in volle mate as genadige en liefdevolle God EN as die God van waarheid wat sy wil aan mense voorhou en verwag dat mense dit moet naleef!

En daarom leer die Here ons vanmore dat ons dieselfde heerlikheid van God moet laat skyn in ons lewe met genade EN en met waarheid. Mense moet ook al twee hierdie wonderlike eienskappe van God in ons lewe sien soos die dissipels dit in Christus se lewe gesien het. Natuurlik gaan ons dit nie in volle mate kan doen soos Jesus nie, maar dit is wat Hy aan ons gegee het en so moet ons ook lewe! God se genade EN waarheid moet in ons lewe sigbaar word!

Die vraag is: hoekom is vir ons as mense spanning tussen genade en waarheid? En die antwoord is: omdat ons die heerlike, volle beeld van God gedeeltelik verloor het met die sondeval! Ons kan nou nie meer ten volle wees soos God nie. Dit is nou vir ons moeilik om te verstaan dat God 'n God van genade en vergifnis is en tog terselfdertyd die God van waarheid wat sonde straf!

Genade en waarheid lyk vir ons soos die twee spore van 'n spoorlyn wat net nooit bymekaar kan kom nie! Een voorbeeld van so 'n spanning is die vraag waarmee baie mense worstel naamlik: hoe kan God sommige mense vergewe maar ander mense vir ewig met die hel straf? Dit voel vir ons dit bots: of God moet alle mense vergewe of God moet alle mense straf! Dit klink regverdig maar genade en waarheid in een asem klink nie regverdig nie!

Dit blyk selfs as gevolg van ons persoonlikhede so te wees dat sommige mense geneig is om als in liefde te vergewe en vergeet terwyl ander onwrikbaar staan op die waarheid van 'n saak en dat reg moet geskied.

Ons sien dit ook in die manier waarop ouers hulle kinders grootmaak. Die een ouer is streng en hou by die reëls en die ander ouer sien maar die kinders se foute oor en probeer net die vrede bewaar.

Selfs kerke kies tussen dié twee: in sommige kerke word om liefdeswil alles verduur terwyl in ander kerke die waarheid onwrikbaar afgedwing word.

'n Mens sien ook iets hiervan met die verkiesing van Donald Trump as president van Amerika en die afgelope week ook met sy inhuldiging. Die Demokrate en Obama word gesien as die liberale party wat alles toelaat en Trump en die Republikeine word gesien as konserwatief en wat volgens sekere beginsels gaan optree en nie alles gaan toelaat wat in die verlede toegelaat is nie. Daarom ook die ongekende geweld en protesoptredes met Trump se inhuldiging.

Maar, brs en srs, wanneer ons egter kies vir een van die twee en die ander een nalaat, is ons nie meer met God besig nie - dan skep ons vir onsself 'n eie god of afgod. God is nie net die een of die ander nie! Christus het huis kom toon dat God vol van genade EN waarheid is.

In God se lewe en bestaanswyse is daar geen spanning tussen genade en waarheid nie want God leef in volmaakte heerlikheid. So het Hy Homself reeds van die begin af in die Ou Testament aan die mens geopenbaar. Onthou julle nog toe Moses die Here wou sien en wat God Hom geantwoord het? Ons lees in Eks 34:5–8: ⁵“Die Here het in 'n wolk afgekom en daar by Moses kom staan en die Naam “die Here” uitgeroep. ⁶Terwyl Hy by Moses verbygaan, roep die Here: “Ek, die Here, is die barmhartige en genadige God, lankmoedig, vol liefde en trou. ⁷Ek betoon my liefde aan geslagte en geslagte. Ek vergewe ongeregtigheid, oortreding en sonde, maar Ek spreek niemand sonder meer vry nie. Ek reken kinders en kleinkinders die sondes van vaders toe selfs tot in die derde en vierde geslag.” ⁸Moses het toe vinnig gebuig in eerbied”

In Christus het God vir ons die twee lyne saamgebring en in Hom kom daar versoening in die oënskynlike spanning tussen genade en waarheid. Christus kom leef vir ons die volheid van God se genade en liefde deur die manier waarop Hy volkome volgens die waarheid en die wil van sy Vader leef. In sy lewe toon Hy ons hoe genade en waarheid saam werk.

Kom ons kyk net na een voorbeeld: die manier waarop Christus die vrou behandel wat haar man verneuk het en owerspel gepleeg het. Die Joodse leiers

wou haar genadeloos oordeel maar Jesus toon hoe die wet in genade toegepas word deur die vrou nie te veroordeel nie maar wat sê het vir haar: "Gaan maar en moet van nou af nie meer sonde doen nie." Daar is genade en vergifnis maar dit hef nie die waarheid van God se wil op nie!

En dit is presies wat God ook bewys as Hy Jesus in ons plek oor ons sonde straf! Sondaars kry genade en vergifnis by God omdat God die waarheid gehandhaaf het en ons sonde aan Christus gestraf het. Daar aan op Golgota kruis die twee lyne van die treinspoor: in Christus kom genade en waarheid bymekaar en bring dit nie meer vir ons wat in Hom glo spanning nie! Ons kry vergifnis maar moet steeds volgens die waarheid leef!

Die wat egter nie in Hom glo nie veroordeel hulleself! Dit gebeur ook aan die kruis: daar is genade vir een sondaar wat saam met Christus gekruisig word, maar die ander een, wat Christus nie as Verlosser aanvaar nie, word volgens die waarheid van God se wil veroordeel!

En br. en sr, ons moenie dat God se optrede oor ongelowiges by ons spanning bring nie! Dit is God se regverdige oordeel en sy regverdige genade wat Hy as God aan mense betoon en ons moet glo dat God dit in volmaaktheid regverdig doen!

Wat belangriker is, is dat ons - wat nou volgens die genade en waarheid wat daar in Christus is - kinders van God geword het, dat ons ook genade EN waarheid leef! Jesus bid in Johannes 17: 22 oor ons die volgende woorde: "Die heerlikheid wat U My gegee het, het Ek ook aan hulle gegee, sodat hulle een kan wees net soos Ons een is." Die heerlikheid wat God aan Christus gegee het naamlik oorvloed van genade en waarheid, het Hy ook aan ons wat in Hom glo gegee.

Hy gee dit deur die werking van die Heilige Gees in ons lewe. In Joh. 14: 16 beloof het dat die Heilige Gees as die Gees van die waarheid ons in alles sal lei soos Christus ons geleer het! Dieselfde genade en waarheid leef nou in ons en ons moet deur albei God se heerlikheid in ons lewe laat skyn. Ons kan nou weer met die herstel wat Christus vir ons gebring het en die leiding van die Heilige Gees, iets van die volle beeld van God weerspieël deur met genade en waarheid te leef!

Ons moet voluit vashou aan die vergifnis wat God vir ons in Christus gee vir die sonde wat ons doen en terselfdertyd moet ons voluit leef volgens die waarheid van God se wil vir ons lewe. God se vergifnis beteken nie ek kan maar aangaan en leef soos ek wil nie – dan maak ons die straf wat God aan Christus gestraf het, goedkoop!

Maar ons kan ook nie waarheid van God se wil leef sonder om genade te betoon nie. Ons kan nie die waarheid so voorhou en afdwing asof mense nie sondaar mense is wat foute kan maak nie! En as iemand 'n fout gemaak het en gesondig het, daardie persoon veroordeel en liefdeloos behandel nie.

Br en sr, God is nie net liefde en vergifnis nie – Hy handhaaf ook die waarheid van sy wil onverslap en ons moet al twee hierdie eienskappe van God aanvaar en daarvolgens lewe! Maar God is ook nie net iemand wat die waarheid van sy Woord genadeloos afdwing nie – Hy betoon ook genade aan die sondaar. Hy handhaaf al twee in volkome balans en regverdigheid.

Net so kinders: moet pappa en mamma reëls hê om julle ook te leer wat is reg en verkeerd. En as ek die reëls oortree dan moet ek die gevolge daarvan dra as pa en ma my streng gaan straf! En ouers: om te dink dat 'n mens maar alles kan oorsien omdat kinders ook maar net kinders is, is nie reg nie! Dan leer ken jou kind 'n afgod want God is nie so nie! God het ons sonde gestraf maar Hy betoon ook genade! Net soos 'n pa en ma liefdevol sal vergewe en hulle kind sal koester as hy of sy 'n fout maak! Maar altyd weer hulle kinders deur hulle foute leer wat die reg en goed is – soos God ons altyd weer bring by die waarheid van sy Woord.

So moet ons dan as gemeenskap van gelowiges in hierdie wêreld die heerlike genade en heerlike waarheid van God laat skyn. Dat ons mekaar kan vergewe maar mekaar terselfdertyd hou by die waarheid van God se Woord.

So kan ek en jy God ook persoonlike belewe en sien! Ons lewe met God en met mekaar is nie 'n keuse tussen hart en verstand nie – dis albei! Die Here het my en jou ongelooflik lief! So lief dat Hy het ons sonde aan Christus gestraf het en aan ons genade betoon. Maar Hy het dit gedoen sodat ek en jy onberispelik volgens die waarheid van sy Woord sal lewe!

En wat van ongelowiges, van mense wat buite die kerk staan? Hulle ervaar die kerk en gelowiges juis as mense wat oordeel en verwerp! Daarom, geliefdes, moet ons met al ons kragte, met woorde en dade teenoor hulle met genade en waarheid leef en getuig! Dit was juis hierdie wonderlike heerlikheid van Christus wat so tussen die mense geleef het, wat skares na Hom toe getrek het en mense tot geloof gebring het! Soos Christus onder mense kom woon het so moet ons onder mense van Potchefstroom leef met die heerlikheid van God – vol genade en waarheid.

Amen